

# YO YWĀNI UYU?



Akusaye ugwe, nkundwe. Ikyene kyo kinunu fiyo ukwisa ku nyumba ya Ntwa.

<sup>2</sup> Une ngwīnogòna ukuti une nāfundaga i Lisimbo limo, akabalilo kamo aka kakindilepo, kangī Ilyene lyāyobile ukuti akabalilo kāko Yeso āsegelīle ku Yerusalemu, ukuti abafūnfigwa balinkufyūsyā ifisige fyābo kangī balinkabona akāya akīkēmo mbutali, kangī abēne bikwānda ukusangaluka nukuyoba, ukuti, “Lilino ngimba ikitangalala kisakupyanikisigwa.”

<sup>3</sup> Kangī u nnyambala yumo uyu āyobāga, pamo ukuyoba isya luyāto lwalululu ku Palestina, kangī umwene alinkuyoba ukuti abandu lilino, nkyīnja iki kyākindaga, bīsaya ku buyo mpaka, akabalilo kāko abēne bikwīsa mmwanya ukufuma nkikoga kangī bikukēta ukusyūngutīla i nguto, u nsebwe gulagula uyu Yeso na bafundigwa bāli pa kabalilo kala, ukuti akabalilo kāko abene bikukēta a kāya, abene bikwanda ukulila.

<sup>4</sup> Umwe mumenye, une ngwitika, kyālipo ikindukimo abafundigwa bala, mmasiku gala, bālīpilike, ukuti—ukuti ikitangalala kikipyanikisigwaga kangī.

<sup>5</sup> Kangī lilino akene ko kifuki kabalilo. Kangī une ngwitika ukuti ikyo kyo bwīpilike ubu buli pa bāndu, ukuti ikitāngalāla kyo kifuki kitendekesigwe kangī.

<sup>6</sup> Nkundwe Neville, gwaipyana kangī untimi gwitu unsayigwa, afumile itolo ukumbūla une isya akabōmbo ka luyigo aka kakwīsa apa pa kipānga, mu kilo ināndi isi sikwīsa, ukuti twīputilēge ngapo. Kangī une ndinkumbula umwene, une ngwinogona ukuti ikyene kikuyaga kindu kisayigwa.

<sup>7</sup> Ugwe itolo ukabagīla ukuya ni sasanio nyingi fiyo. Kangī utubalilo twingi uswe tukwegaga inyinogono insobi sya lusasanio. U luyigo lukaya fiyo-fiyo ukuya ukutwāla nkati abāndu abapya, lōli ukwēne ko kuyiga iki uswe tutalile tuli nakyo. Kangī une ne . . .

<sup>8</sup> Une nīganile ukuyoba iki, panongwa yakuti une nguyoba ikyēne ukufuma ku busolofu bwa ndumbula yāngu. Ukuti une nāndile ukwāga ubwīpilike ubukīndane ukusyūngutīla i kipānga ukukīnda iki kifumile pakuya kukabalilo katali, u bwīpilike bwa—bwa amīnogōno agamwambepo amasolofu, ngati mūmo ikyēne kyālisibīle ukuya, akabalilo katali iyolo; aka ikindukimo iki kikusēngama, kangī ikyēne kili nalo u lwālo lwanalōlilōli. Kangī une ngusubila ukuti Kyala isakusayaga ikipanga ikinini iki, kangī . . . ? . . . kangī mu m'maka gake.

<sup>9</sup> Kangī une nguketa ulubatiko lwa kuyēnga lukukindilila, kangī une ngwinogona ikyo kyo kindu kikulumba. Kabuno,

lululupo pamo pankyenipo, uswe twe bāndu bakāngalepo tukuyaga pakufūla ikilwilabwīte nukukipapo ikyēne ukugomokesya m'maboko ga bāna bītu, kangi nukwēnda pamwanya pa Njilayamafyūkilo iyagolidi yila.

<sup>10</sup> Ilisiku limo une ndinkukinda sinda-gwa-njila gwa bung'wayle lilino, ugwa fyinja malongo mahano mbukusi. Une itolo ngabagila ukukyagania ikyo. Kitikuboneka ngati akēne kakafuma kabalilo nakamo ukufuma pāpo une nākwābaga ifyalilūka kuli Chris Meisner, ukufwana kalongo-na-lwele, kalongo-na-ntandatu, kalongo-na-lwele mbukusi. Loli itolo nābukile pa buyo bumo. Ikyene kikubuka ukunangisa itolo ukuti apa uswe tukaya nako akaya akakukindilila, loli uswe tukulondalonda Kamo akākwisa. Kangi ako ko Kāya kūko Kyala yo njengi, kangi kula kutisakuyamo siku nu bumalikisyo kula.

<sup>11</sup> Ulubunju ulu, mumo une nāyobelāga pa kimanyisyo kya Lisiku lya Māma, nukugela ukumbīkapabuyo u māma komma mūmo umwēne nalōli ali, mu ngulilo ingāngāle, ni nginya, na fyōsa ifi, ingili yāke, pamo ikikota kyamagudumu ikyaiyolo, pamo ikikota kya lukōngi, kangi nakandeko akanini aka maluba kitūgēsye kifuki nu mwēne; lōli māmo mu busyūke, agomosīgwe kula ku butubwa bwāke, kangi īmīle, ukumulika ngati mwēhe. Iyo yo njila une ngwiyela ukwīnogona isya māma gwāngu. Une ndikulonda ukummwinogonela umwēne bo umwēne ali umwisyugu, unkāngāle. Une nīganīle ukwinogona isya iki kikwisa. Kangi une mmenye umwe mukwipilika injila yila isya bamāma bīnu. Inogona isya umwene mumo umwene naloliloli ali mu ndumbula yake. Palema nalinga bīngi. . . bo umwāti ikuyoba, “Ubūmi bukaya bupepe ku mwēne, lōli umwēne abagīle ukuya mūmi ikyēne mōsa kāngi, itolo ukubōmba ikindukimo kwa ugwe.” Popāpo Kyala ikuyaga pakutēndeka ikyēne injila yimo ukuti umwēne abagīle ukuya mūmi kwa bwilanabwila na ugwe. Popāpo une nhobwike panongwa ya ikyo.

<sup>12</sup> Une ngamanya nongwa ya fiki, une ndendīke ukufumusya uku, ulubunju ulu, iki une nguyobaga ikilo iki, linga u Ntwa ikwitikisya, pa: *Yo Ywāni Uyu?* Nalōlilōli ngamanya mūmo une nguyaga pakubōmba ikyēne. Lōli une nālikolēnie lōsa mpaka kifuki isala na maminiti kalongo aga gakīndilepo, pa malālusanio pamūsi pōsa, kangi nāli ni fyāpalubafu kangi—kangi ingōlelo mbibimbibi. Une ndinkutoligwa ukusitēndeka isyēne.

<sup>13</sup> Kangi une ngulōnda umwe ukukīndilīla ukummwīputīla Dokotala Sam. Umwēne—umwēne ikwisa mula kanunu, kangi uswe tuli bakupālisya. Kangi Dokotala Baldwin nu Nka. Baldwin bosa-babili bikubūmbuluka. Abēne bikufika mula kanunu.

<sup>14</sup> Une ngulōnda umwe ukubīka ikipyā kimo pa lubātiko lwīnu ulwa lwīpūto, pamūsi apa. Uyo yo Harry Lease pāsi

apa, umūlisya-mikota. Haller yo mwinake gwa une nīmwene. Kangi bo mūmu une nummanyile umwene, une ninogonaga umwene aali Nkristi, mpaka pamusi apa, akabalilo kako u nkundwe gwake ātendike ubusume bwa bupoki bwa moyo gwake. Nkundwe Mike Egan ātwēle i . . . inkyūngafyūma gwītu apa, ātwēle i nōngwa. Kangi Harry ali mbwitugasye ububibi, panja ku kipatala. Une ngāmenye umwene ālinogwine fiyo sila isya une; loli, umwēne alinkunkāna untimi gwake mwene, pamusi apa, pamo untimi gwa kipanga kuko umwene ikubuka, kangi aalondaga une ukwisa ukumbona umwene. Kangi une ngulōnda ukubūka ukunkēta umwēne. Popāpo, ipūtila Harry.

<sup>15</sup> Uswe tuhobwike apa, ikilo iki, ukummwāgānia, bo binangu apa, ukufuma kula mu Georgia, Nkundwe Welch Evans kangi i nyumba yake. Une nguketa, kangi, abayāti abangi aba une ngābamenye abene, lumo bāli apa ulubunju ulu.

<sup>16</sup> Linga une ngasoba, une ngumbona Nkundwe na Kalumbu Elmer Collins kunyuma kula, ukufuma ku Phoenix, Arizona. O, ugwe ukānduka mma. Kuboneka ngati ugwe gwābagile ukuya mu myēnda gyāngu gwa pa nsebwe gwa sitima, kangi—kangi kwīsa nkati ukufuma ku nsebwe gula. Kangi kwāmbililīgwa ukugomokela ku kāya! Une ngabagila ukukulālūsya ugwe ukusyāla kuno, 'nongwa yakuti ugwe gwābwāgile ubuyo ubununupo, muketile, ikyo kyo kinunu fiyo, Phoenix. Ngulōnda ukwitugasya kula, ilisiku limo, nīmwene.

<sup>17</sup> Kangi polelo une ngumbona Nkundwe Smith apa, ugwa Kipanga kya Kyala, panja pala. Nkundwe Smith, akēne kapēgigwe kwa une, u būku gwīnu unnini, ilisiku limo, pamo mmayolo pamūsi, bo kwīlīle. Une ngāli ngalibala ilyēne, lōli nalōli nisakulītikisya ilyēne, akabalilo kōsa une mmēnye ugwe gwāsīmbile ilyēne. Ikyene kibagisenie ukuya kyābwanaloli, i Lisimbo ilyabwanaloli. Kyala akusaye ugwe. Kangi une ngusūbīla ikyene kyo buponjoli.

<sup>18</sup> Kangi bīngi abangi, une nābagīle ukuyoba. Umwe mwesa mukwambililīgwa apa ku kipanga. Kangi une nālikyēlīle ulwimbo lula, ulubunju ulu, ulwa Kalumbu Stricker uyu īmbīle, “Umwene ikukētēsya ukwisila mu bulatiko, ku mwene.” Unkūndwe gwāngu gwa kiMennonite apa, nhōbwike ukuya na bēne muno. Kangi, o, aligwēsa gwa umwe! U mwīnāngu apa, une ngwītīka, ukufuma ukukilania mu Illinois, umwānake ikwēga ifyakwēgelela ku nyuma, ngufikaga ukwāgāna na bēne kāngi. Kangi bīngi fiyo, une mbagile . . . Komma ukwinogona une ngukuyōnga ugwe linga une ndikuyikolela ingamu yako, loli une itolo ngwāmbilīla umwe mwesa.

<sup>19</sup> Lilino unko uswe tubale ikilo iki, ku kimanyisyo kya Lisimbo, ukufuma mwa Matai untu gwa 21, ukwānda pa linandi lya 1, nukubala pāsi, kangi lya 11, ukōngānia.

*Kangi akabalilo kâko abêne balinkusegelêla ku Yerusalemu, pala palinkwîsa, kangi balinkwîsa ku Betifegi, ku kâmba ka Mâfilu, polelo alinkubatuma Yeso abafündigwa babili,*

*Ikuyoba ku bêne, Bûka nkâya ukukilania kifuki na umwe, kangi mu njila ya kutalula umwe mwisakwâga imbûnda yipînyigwe, kangi akafalasi akanyâmbala ni yêne: ukusyâbula isyêne, nukusitwala isyene kwa une.*

*Kangi linga unnyâmbâla aligwêsa ikuyoba kalikôsa kwa umwe, umwe mwisakuyoba, U Ntwa ali nubufumbwe ni syêne; kangi lululu ulu umwêne isakusituma isyêne.*

*Fyosa ifi fyaabombigwe, ukuti icyêne kyâbagile ukufwanikisigwa iki kyayobigwe nu nsololi, ikuyoba,*

*Babûla . . . a bânabalîndwâna ba Siyoni, Kêta, u Mwalafyâle gwâko ikwîsa mbôlôlo . . . itügèsye pamwanya pa i mbûnda, ni falasi i ngeke iya mbûnda.*

*Kangi abafündigwa balinkubûka, nukubômba mûmo Yeso âbalagile abêne,*

*Nu kutwâla i mbûnda, kangi ifalasi innyâmbala, nukubîka pa syêne imyênda gyâbo, kangi balinkumbîka umwêne pamwanya pala.*

*Kangi i kilündilo ikinywâmu fiyo kilinkubâlûla imyênda gyâbo mu njila; kangi balinkutumula isâmba ukufuma mmîpiki, kangi balinkubalania isyêne mu njila.*

*Kangi i kilundilo iki kyaabukaga pankyeni, kangi fila fyakongaga, balinkulila, nukuyoba, Hosana kwa mwanundumiana gwa Davidi: Nsayigwa yo umwene uyu ikwisa mu ngamu ya Ntwa; Hosana pa mwanya ukukinda.*

*Kangi akabalilo kâko umwêne âlîsile nkati mu Yerusalemu, akâya kôsa kâgutigwe, bikuyoba, Yo ywâni uyu?*

*Kangi ifilundilo fyâyobile, Uyu yo Yeso unsololi gwa Nazareti . . .*

Unko uswe twinamisye imitu gytu ku lwiputo.

<sup>20</sup> O Ntwa, uswe tukuswiga itolo iki uswe angali tuyobile, linga uswe twitugasyaga mmasiku gala. Loli uswe tuli nu bumi mu lisiku ilikulumbapo, akabalilo kako uswe tukundonda Umwene ukwisa. Kangi bo uswe tukutendeka ubwitendekesye, Ntwa, ega indumbula syitu sitendekesigwe, kutwâla nkati gyôsa imisigo igi uswe tubagile ukubûngânia ukufuma ku migûnda igwamfûnjo, kôsa-kubili ku kâya kangi pânja, uswe tukwînogóna kangi mu kugûlîla pa kabalilo aka uswe twisakumbonaga Umwene

ikwīsa, itogile pa falasi inyēlu, ikusuluka ukufuma pa fifigo fya Lwimiko, ukwāndūla nukubūmba igi imikāngale imibolano imibili gwa uswe, ukubuka mu mbili ugwalwīmiko umfwāne bo u Gwāke gwēne, kūko kakabagila ukuyako ubutulwanōngwa nabumo, pamo ikimanyilo nakimo ikya bufwe ukwīngilamo siku. Kangi uswe twisakumbona Umwēne bo Umwēne ali, nu bumi, kangi nukungana Umwēne mu ngulilo syosa isi sikwisaga.

<sup>21</sup> Uswe tukukupalisya Ugwe panongwa ya kipanga iki kangi panongwa ya ntimi gwāke, kangi panongwa ya bakyungahela na badiakoni, kangi panongwa ya mundu aligwesa uyu ikwisa apa; kangi panongwa ya bayāti aba bali mfipata fyītu, aba bo ng’osi sya ntimo gumogwēne, lōli ukufuma ku kibaga ikīngi. Uswe tukusuma ukuti Ugwe kubasayaga abēne, ikilo iki, nu Kuyapo Kwāko.

<sup>22</sup> Kangi tuswilaga uswe pa Lisyu Lyako, ukuti uswe tubagile ukubuka ukufuma kuno, ikilo iki, nu kwīkasya ukuya Bakristi banunupo ukukinda mumo uswe twāyililemo siku. Tulibūkāga uswe nu lusūbilo ulupya mu ndumbula yītu, kangi nu buhofu, ukugūlila ku Kwisa Kyāke.

<sup>23</sup> Linga nu lusako babāgile ukuyangapo bamo pakati pa uswe, aba babine na bonywa, uswe tutisakwibwa ukwiputula abene. Ukuti abēne. . .Ukwisa mu kiyumba, ikilo iki, kūko uswe twībūngénie ku bwīpūti, ukwisa muno, babine, abene baligomokelāga kanunu.

<sup>24</sup> Kangi uswe tubagile ukusūmila bābo aba bikubūmbulūka, ntwāya kangi mfipatala, kangi bali pa fitala fya bōnywa. Uswe tukusuma, O Kyala, ukuti i kisa Kyako kisakufikila pási ku bene.

<sup>25</sup> Uswe tukwīputilāga bala bābo batikupāsya, ikilo iki, aba bakāli bokōnja nukukēta u Ntwa yo nnunu, aba batikumanya iki ikylene kikusanusya ukuya baganigwa na Kyala. Abene itolo batikupilikisya iki abene bikupōndwa. O Kyala, ngusuma ubufumusye bumo bwa rediyo, pamo injila yimo, kupalamasye indumbula syabo, ni nyenyemusyo syābo sibagile ukusanusigwa kwa Ugwe bo kikāli i kifigo kya kisa ukwīgaligwa kangi abēnu kwīgaligwa pānja, ukwīma amabulōngi kisita kisa.

<sup>26</sup> Tutula uswe, Ntwa. Ifindu ifi uswe tukusuma mu Ngamu ya Ntwa Yeso, kangi ku lwimiko Lwāke uswe tukusuma ikylene. Amen.

<sup>27</sup> Abāndu bāli fiyo balūndēne ukusyūngutila ifipata, kangi ingīndi syāli sīmīle, kangi bukālīko nu buyo nabumo kuli abāndu ukugonako. Abēne bālāmbalēle pānja pa kibūmba, pōsa pa lubīngilo, panongwa yakuti uyu āli yo pāsa. Kangi abandu bikwisa ukufuma nkisu kyosa kyapasi, ukwiputa pa kabalilo aka. Akēne kāli kabalilo kāko u kang’osi gwa pāsa ābūtīgwe. Kangi i. . .Ikyēne kyīmilāga ulubāngo lwābo ukufuma ku Igupti, u bwāmmīnyololo. Kangi abēne bākyūngile iki, ikyīnja kilikyōsa. Ikyīnja kilikyōsa, u pāsa unkulumba

uyu āboneka pabuyo. Kangi akēne kāli kamo mwa tubalilo utwāpamwānya ukukīnda utwa i...pamo ifyakuboneka fya bwīputi bwa kiYuda, panongwa yakuti akēne kāsanusyāga akabalilo aka abēne bāponesigwe.

<sup>28</sup> Abāndu bōsa bīganīle ukwinogona isya ikyo, akabalilo kāko abēne bāponesigwe. Mūmo fikuti aligwēsa gwa uswe, ikilo iki, tubagīle ukugomokela ku kabalilo kāko uswe twāponesigwe! Iki ikyēne kyāsanusyāga kwa uswe!

<sup>29</sup> Une mbagīle ukukūmbukila mbwisibile bwāngu bwēne, isya mūmo imbelakisa indumbula yāngu yākilumiana yānyonywaga ukumpalamāsyā Kyala. Une ndinkwinogona, “O, linga une mbagīle itolo ukubuka kula nukukung’usya pa kifigo Kyake, nu kuyoba kwa Umwene pakabalilo kanini!” Kangi, ena, umwe mumenye akapango kangu. Une ndinkwiwēgēle nimwēne ikalatasi ni kisimbilo, kangi nāyaga pakunsimbila Umwene u kalata, ’nongwa yakuti une ngābagīle ukuyoba ku Mwene. Kangi une nāmenye ukuti Umwene itugalāga mmatengele, panongwa yakuti une nālimpilike Umwene, kangi une nālimbwene u Gwake ikwendendeka mmatengele. Kangi i—i kasisimikisigwe, akayila akakūlu aka une nālisibile ukubūka pāsi akabalilo kāko une nābagīle ukufwīma pamo ngubūka ukulob’iswi. Une ndinkwinogona, “Une ngutulikaga itolo akene pa mpiki, kangi ukuyobela akene kwa Tata. Yeso.” Itolo i njila yimo ukuti u nsigo gula gubagile ukuya ukufuma mu ndumbula yangu.

<sup>30</sup> O, ikilo kila, kula kula! Une mbagīle ukwībwa ubukusi bwāngu, une mbagīle nukwībwa ingamu yāngu akabalilo kamo, lōli une ngabagila ukwībwamo siku isala yila akabalilo kāko Umwēne ālimbonisye une ukufuma ku butulwanongwa. Ikindukimo kyābonike pabuyo, pasi nkati mwa une, ukuti ikyene kindūlile une ukukinda isala ingulumba mu ngisi. I sala ya lubāngo lwāngu, ubusito bwa butulwanōngwa bwālīndekile une, kangi une nāli mūmdu umpya. Une nāli kipeligwa kipya mwa Kristi Yeso, ukufuma kulakula.

<sup>31</sup> Kangi abaJuda aba, abene bīsaga pala, ikyinja kilikyosa. Kangi yālipo i—i nyibuko nkati nkipanga. Kangi abēne balinkwēga u—u nkati, kangi ilisēke ilikāli, kangi a kang’osi, kangi abēne balinkunwa ukufuma ku nyībūko iyi nkipanga. Kangi abene balinkusangaluka palikimo panongwa yakuti Kyala ābanangisye abene ubukūndwe. Popāpo, aka ukuya kabalilo ka pāsa, kangi akāli mwēne pāsa mma, lōli umwēne āli pāsa gwapalubafu.

<sup>32</sup> Umwe mumenye, utubalilo tumo utu uswe tukubuka ku kipanga kangi...Uswe akabalilo kōsa tukwīgāna ukubūka, lōli tulipo utubalilo tumo utu ikīndukimo ikyapalubafu kikuboneka.

<sup>33</sup> Kangi aka kāli kamo ka tubalilo tula. Imbepo yanyenyemusigwe nu bugūlili, itolo mūmo ikyēne kiyīlile

umwīsyūgu. Gōsa a māso ga bala bābo bālingānile umwēne gākētesyāga kuli Umwēne ukwīsa nkati ku kipata.

<sup>34</sup> Kangi une ngwitika ikylene kyo bubombelo ubukulumba injila yila umwisyugu, kabuno bala aba banganile Umwene bikundondesya Umwene. Imbepo yinyenyemusigwe nu bugūlili.

<sup>35</sup> Akabalilo kākō, uswe tukwītūgāla mu lisiku ili, akabalilo kākō i kīsu kyo naloliloli, kīsile ukuya kamo akakulumba akatini ka bupufuke. Kangi sayansi yikutubūla uswe, “Agene itolo ma miniti matatu mpaka kilo pakati.” Kangi une nsisimikisye umwe mwābalāga, bo une, ilisiku ilīngi, akapāngo kala isya nkūlumba-gwa-bwīte mu sikali, alinkuti, ukuti, “Linga bwalipo ubwīte ubungi, ubwēne bwābagile itolo ukumalika mu maminiti mabili pamo matatu.” Amasiku gaiyolo agakulwīla, kangi ukutusulila indusu, nukukūmba ifibwīna fya bakāmbwe, ago go gamalike. Abēne bikwīyobela ubwīte ubukōnge bwisa itolo ukuya mabili pamo maminiti matatu. Ilisiku limo, yumo u mūndu unsulikigwe ikuyaga pakupufula ikīgālilo kyāke ukusōsyāpo nukutusulila limo mwa fipufulilo fila. Kangi akabalilo kākō abēne bikubōmba, uswe tuli nafyo ifitumigwe fyakupilikisya, kulikōsa, ukutusulila ikyēne ukugomokesya kāngi. I kīsu itolo kikabagile ukwikāsa ikyo.

<sup>36</sup> Aligwēsa kwa pāsa āmēnye ikīndukimo kyāyāga pakuboneka, lōli abēne bakāmēnye itolo iki ikyēne kyāli.

<sup>37</sup> Kangi iyo yo njila ikylene kiyilile umwisyugu. Kifuki aligwesa amenye ukuti ikindukimo kikwitendekisye ukuboneka. Aligwesa amenye ikyo. Ugwe ubagile ukuyoba ku ntulwanongwa, ugwe ubagile ukuyoba ku bakyulusi, ugwe ubagile ukuyoba kwa aligwesa, kangi, o, akēne ko kabalilo kasitakutūsyā ka luko aka kīsu.

<sup>38</sup> Loli ugwe ubagile ukuyoba ku nnyambala pamo u nkikulu uyu ikundonda Umwene ukwisa, kangi ulwimiko luli pa kisyo kyabo, lukumulika panja. Abēne bikukētēsya ku kyakubōmbígwa ikikulumba kila. Popāpo i mbepo yōsa yinyenyemusigwe kangi, ukugūlila ikindukimo ukuboneka. Ikisu kyapasi kitikumanya iki kili kifuki ukuboneka, loli i Kipanga kya Kyala gwabumi kimenye iki kikubonekaga. Abēne bikumanya ikyo lululu ulu ingangabwite yisakukūba, kangi uswe twisakumbona Umwēne ikwīsa, itogile ukufuma ku Lwīmiko, pa falasi inyēlu, kangi ababwite ba Kumwanya balinkunkōngēsya Umwene. Kangi bala aba bafwīle mwa Kristi bisakunyakiligwāga nukwēgigwa mmwanya ukwakwāgāna nu Mwēne mu mbepo. Ikyo kyo iki uswe tukulondesya. Uswe twisyukile panongwa ya ikylene.

<sup>39</sup> Kangi uswe tubūligwe ukuti imyoyo ya bamāma bala, na fyosa bo ifyo, uswe twāyobilemo ulubunju ulu, itolo pāsi pa kigemo kya Kyala, bikukūta, “Kabalilo katali bule, Ntwa? Kabalilo katali bule?” Māma ikulōnda ukukukēta ugwe ukuya

fiyo mūmo ugwe kulōnda ukunkēta umwēne. Kangi abaganigwa bitu bikulōnda ukwāgana na uswe bōpe bo mūmo uswe tukulōnda ukwāgana nabo.

<sup>40</sup> Bo bwībūnganie-kangi buki ikyēne kisakuyaga, akabalilo kāko Umwēne ikwīsa! Ukwāgana na baganigwa bitu kangi ukubabona abene mu mbili gwabo ugwa busyūke, kangi gwīmikigwe, nukwendendeka ukusyūngutila nu gwakilingo gwa busyūke, ikukētēsya akayīlo kābo, mūmo akēne kāndukile, ubōlōlo kangi ubwakimyemye. Kangi ikyēne kitisakuya kwīkolania nu kubēla, kangi ukunyēla nu kuyūgānia, kabuno uswe tuli nayo Syēpwa ukwitūgāla palikimo.

<sup>41</sup> O, iyi ingulumba ingulilo inyenemusigwe iyi uswe tukwitūgalāmo, itolo kisita kabalilo nakamo kuli nakimo, itolo ukufyūka, kangi ukuyūgānia, kangi ukukōla, fiki, ilyēne lyo lisiku ilitīlisyē.

<sup>42</sup> Polelo, bo abene bagūlīle ku kindukimo ukuboneka, ikyēne kyāli kibībi fiyo mpaka bīngi ba bala ku pāsa kangi bakāfilēmo siku ukumbona Umwene. Pōpe, abēne bāmēnye ikindukimo kyāyāga pakuboneka pa buyo, lōli pōpe abēne bakāfikileko ukumbona Umwēne.

<sup>43</sup> Momumo ukwene kwisakuyilaga pa Kwisa kwa Ntwa. Balipo abandu bingi abasitalutūsyo, umwisyugu, aba bamenye ukuti ikindukimo kītendekisyē ukuboneka, loli abene—abene batisakumbonamo siku Umwene. Kabuno Umwene isakwisilaga nkimyemye kya kilo-pakati, ukunyakilila ukusōsyāpo kala akanini a Kapānga aka kīsyūkile kangi kakugūlila kangi kakulōndēsya ukunkēta Umwēne. Abo bo bala Umwēne isakwīsa nukunyāka ukusōsyāpo. Bīngi ba nkīsu aba bikwitūgāla pa mbwikyēle, kangi ukusekela imyoyo gyābo pa findu fya nkīsu, batisakumanyamo siku iki kyābonīke, mpaka i Kipanga kikīndīle mu Lwīmīko, kabuno Umwene isakwisaga ukuya nhiyi nkilo nukubakola abene panja. Polelo uswe tubagīle ukukēta uswe tugomokīle kangi ku buyo bulabula. Lilino uswe tukusyāgania, ukuti, ubugūlīli ubu, ukuti Kyala ikwisa ku bala bābo... Mōsa ukukinda mu Masimbo, ikyene kifumile pakuya kindu kilakila. Ukuti abēne bo... Umwēne akabalilo kōsa ikubonekela ku bala bābo bikungūlila Umwēne, akabalilo kōsa ku bala bābo bikulōnda ukumbona Umwēne. Kangi une nsisimikisyē ukuti ulo lo lusubilo ulu luli pa ndumbula syitu ikilo iki.

<sup>44</sup> Ukwene kuli kifuki imyesi ntāndatu igi gikindilepo, une ngusakisyā, une nagelaga ukuyoba ku bandu bamo. Kangi une ndinkuti, “O, ukwinogona isya ikyene, ukuti itolo kifuki akabalilo kosa Umwene ikwisaga!”

<sup>45</sup> Kangi iki kyambelaga une ukuyoba isyo, une nayobaga isya Nkundwe Bosworth. Akabalilo kāko une nābūkile ukwakunkēta yula umwīkēmo unkāngāle, akabalilo kāko uswe twāpilike



umwēne āfwāga, malongo-lwēle-ni-kindukimo ifyīnja mbukusi, unkasi na une ngubuka ukusuluka ku . . . kula ukunkēta umwene bo akāli ukufwa. Une itolo ndinkufimbilisigwa ukuyoba ikindukimo ku mwene. Une nīganile ukukētēsya abikēmo akabalilo kāko abēne bikwīngīla mu Lwīmīko, kangi une ndinkufimbilisigwa ukumbona umwēne. Kangi uswe tōkyāga amatayala ukufuma mu ligāli.

<sup>46</sup> Lōli bo une mfikile kula, kangi ndinkubopela ku kifigo, mu kanguto akanini ālambalēle yula unkāngāle umzee. Umwēne alinkufyūsa u mutu gwāke mmwanya bo umwēne ālimbwēne une ngwīsa. Agāke amakāngāle, amaboko amasitamaka galinkwitūga pānja, nu nnyōfu gwitulike pāsi. Kangi umwēne alinkufikila ingōngi syāke kuli une. Kangi une ndinkunkōla umwēne ukusyūngutula ilikosi nukukūta, “Tāta gwāngu, tāta gwāngu, amagilēta ga Israel, kangi abanyāmbala ba falasi bali pala,” kabuno umwēne āli nkemesigwe, nnyāmbala gwabunyakyala.

<sup>47</sup> Kangi une ndinkuti, “Nkundwe Bosworth, une ngulonda ukukulalusya ugwe ikindukimo. Ngimba ugwe kwitika ukuti ugwe kuyaga kanunu?”

Umwene alinkuti, “O, une ngaya mbine nukuya mbine mma.”

Une ndinkuti, “Mulimōsa, fyo fiki fitamisye?”

<sup>48</sup> Umwene alinkuti, “Une ngubuka ku Kaya.” Umwene alinkuti, “Une ngatele, kangi une mmalike. Kangi une ngulonda itolo ukubuka ku Kaya.”

<sup>49</sup> Une ndinkuti, “Polelo ugwe kusyagania ugwe kufwa?” Une ndinkuti, “Une ngulonda ukukulalusya ugwe i kindukimo. Kunyuma ukusuluka ukukīnda ifyīnja malongo-mahano-namabili nifyakōngelelāpo ifya butumigwe, kyo fiki kifumile pakuya miniti yāko iyālwmīko ukukīnda? Ngimba ugwe ubagile ukuyoba kwa une, nkulumba, kangi mbula une ngimba kyo kyakukubonekela nki ugwe gwāli nakyo, pāsi pa lukīndi, ukuti ugwe gwābagile ukubala sala yako ingulumba ukukinda.”

<sup>50</sup> Une ngwitugalaga ukuketa ingulilo yake, une ndisakwibwamo siku, bo amaso gangisi gala gangolile une, pamwanya pa mandalasi gala. Umwene alinkuti, “Nkundwe gwangu umpala, aka ko kabalilo akakulumba ukukinda aka bumi bwangu. Une ngabagila ukwinogona isya kabalilo kalikosa aka kali ko kalwimiko ukukinda lululu ulu.”

<sup>51</sup> Une ndinkuketa umwene nkisyo, kangi une ndinkuti, “Nkulumba, ndimba ugwe ukāli umenye ukuti ugwe kufwa?”

<sup>52</sup> Umwene alinkuti, “Nkundwe Branham, une ngulambalala apa, ngugulila i miniti yiliyosa kuli Umwene ukwigūla i kifigo kila nukwisa, ukunyega une ku Kaya nu Mwene.” Iyo yo njila iya kufwa. Iyo yo njila iya kubuka.

<sup>53</sup> Kangi mūmo umwe mumēnya, ukuti, kifuki isala sibili bo akāli umwēne ukufwa . . . Umwēne āli, āfumile pakulāmbalala mu kusilika, kuli ukukilania amasiku mabili. Kangi akabalilo kako umwene ālisīle ku mwene, umwene alinkufyuka nkyumba, nukwanda ukuyoba ku nkasi gwake. Polelo, mbibimbibi itolo, umwēne alinkuboneka ukuya gwakulāngāla. Kangi umwēne āponēnie amaboko, ku sala yōsa pamo ukongelelāpo, na bīnake, aba bafwīle ku fyīnja malongo mana pamo malongo mahano, aba bāli bapīnduke bāke nkipānga kyāke. Ukuponania amaboko nu nna nu gwise. Mpaka umwēne āli . . . ubūmi bwāgulekīle u mbili, gulāmbalēle pāsī pa kyākwīgemēsya kangi gulinkubūka ukugon’utulo, mu ngōngi sya Ntwa Yeso. Kikayako nakimo ngati ukumbōmbēla Umwēne, ukungūlila Umwēne.

<sup>54</sup> Kangi bo une njobile ku nnyambala uyu ukufwana na iki, nukumbula ubwendelo bula, une nāyobile iki. Une ndinkuti, “Nkulumba, o, ngimba ikyene kitisakuyaga kyalwimiko akabalilo kako uswe tukumbona Umwene? O, linga Umwene ābagīle ukwisa umwisyugu!”

Umwēne alinkuti, “Nkundwe Branham, komma ukutīlisya abāndu bo ulo.”

Une ndinkuti, “Ngimba ugwe kusanusya fiki?”

<sup>55</sup> Umwēne alinkuti, “O, komma ukugela ukubabūla abāndu ukuti ikīsū kikwīsa, pamo Kristi ikwīsa. Ikyēne kikubatīlisya abēne.”

<sup>56</sup> “O,” une ndinkuti, “umma. Une ngusuma uluhobokelo lwako. Ku bala bābo bikundondesya Umwēne, ikyēne kyo nongwa iyālwmīko fiyo iyi abēne bābagīle ukupilika, ukuti Yeso yo itolo kifuki ukubongotola ukukīnda usakwēga i Kipānga Kyāke.” Ubukāngāle bwisakusanusigwaga ku butubwa. Ubuhobofu bwisakupīgwāga mbuyo bwa busulumanie. Ubumi bwisakupīgwāga mbuyo bwa bufwe. Kusitakufwa mbuyo bwa bufwe, fisakupyānikisaniaga. O, ko kabalilo kaki, ukumanya ukuti Umwene isakwisaga!

<sup>57</sup> Abēne bāndōndāga Umwēne. Abēne bāngūlilāga Umwēne. Kangi akabalilo kāko Umwēne ikwīsa, uswe tukwāga ukuti fyāli ifiyabo fibili. Ikibugutila kimo kyāli kuli Umwēne, kangi kimo kyāli kyakulwana nu Mwēne.

<sup>58</sup> Kangi iyo yo njila uswe tukukyāga ikyēne umwīsīyūgu. Ikyo kyo iki, ukwīsa Kwāke, akabalilo kōsa kupāgulēnie abāndu. Akabalilo kalikosa, akabalilo kako ugwe kummwaga Yeso, ugwe kwaga bala bābo babagīle ukukanikana ni Kyene. Uyo yo Sétano. Kangi, umwīsīyūgu, akabalilo kāko uswe tukwīnogōna isya ikyēne, uswe tutikukēta ulwānduko ulwīngi. Itolo kilakila. Abāndu basanusīgwe, lōli u mbepo gwa bāndu akasanukamo mma.

59 Popāpo akabalilo kāko abēne kubumalikisyo bākētīle pānja ku kipata nukumbona Umwēne ikwīsa, itolo pa kala akanini, akambūnda akēlu, fyōbēne abafundigwa balinkwanda uku—uku ukukūta, “Ikitangalala kya Kumwanya kīsile!” Abāndu balinkubopa ukwāgāna nu Mwēne, kangī gwēsa Yerusalēmu afuluganikēne. Kilipo ikindukimo ukufwana ni kyene, akabalilo kako Yeso ikwīsa, ukwēne akabalilo kōsa ko kufuluganikana. Kangī a kāya kōsa kāfuluganikēne. Kangī abēne—abēne bakabagila ukufisa ikyēne.

60 Kangī abalūmbilili ba lisiku lila bāfīmbilisigwaga ukupa ubulīngānio panongwa ya bufuluganike ubu, panongwa yakuti ulwēne lwāli lusekelo lwa pāsa. Kangī abēne balinkulāta, “Yo ywāni Uyu?” akabalilo kāko i mbepo yānyenyemusigwe, kangī ukwīsa kwa Ntwa Yeso, ku Yerusalēmu, kwānyenyemwīsyē imbepo nu bugūlili, ikyēne kikuboneka ngati abamanyisi bikulōndigwa ukumanya iki kyayaga pakuboneka pa buyo. Ikyēne kyābonekaga ngati u mpūti unkulumba ābagile ukuti āmēnye ikyēne. Ikyēne kyābonīke ukufwāna ukuti bōsa abāngi abīpūti babagile bākīmēnye ikyēne.

61 Kangī ikyene kikasanusya kilikyosa, umwisyugu, panongwa yakuti u Mbepo Mwikemo ikutala ukwīsa kwa Ntwa Yeso. Kangī bo u Mbepo Mwikemo ikwānda ukwibālūla pānja ukukilania i kīsu, imyōto gya luyigo gikwīlasulania pānja, kulikōsa, ifimanyilo ifikulumba ni fiswīgo fibōmbigwe, imibūmbulusyo gibonīke pa buyo, isololi sibūkīle pānja. Syōsa i imbunganio sya sayo sya batumigwa sigomokile ku Kipanga kangī. Popāpo, mumo ikyene kyayilile akabalilo kala, momumo kiyilile ikyene lilino, u mbepo gwa nsitakwitika akāli ikukūta panja, “Yo ywani Uyu?”

62 Bamo mwa bene bitikaga pa Ntwa Yeso, ukuyoba ukuti Umwene ali Nnyambala unnunu. Bamo mwa bene balinkuti, “Umwene yo Nnyambala unnunu.”

63 Ikyo kyo iki abēne bikuyōba umwīsyūgu. Abēne bikugela ukumbīka Umwēne ukuya Napoleon, ugwābwīte. Abēne bikugela ukumbīka Umwēne ukuya yo—yo George Washington, nnyāmbāla gwanalōlilōli. Lōli Umwēne āli nkindane ukukīnda ikyo.

64 Ngimba umwe mwākētesīsyē ukubala kwa Lisimbo? Abēne balinkuti, “Uyu yo Nsololi uyu ikufuma ku Galilai.”

65 Kangī abene bikugela ukuyoba ikindu kilakila umwisyugu, akabalilo kako abene bikububona ubugute ubunywamu ubwa Ntwa: ukupyanikisya ukugomokela, ku bukafu, ababine na bonywa; ukumbona Umwēne ikubōmbēla u Mbepo Gwāke mu Kipanga Kyāke, ukumanya aminogono ga bāndu; ukunkēta Umwene ikubomba mumo itolo Umwene ābombile akabalilo kako Umwene āli pa kisu, ukufwanikisya iki Umwene

áyobile kikubonekaga; naloliloli, ifipānga kangi abāndu bali, bikulālūsya iki, “Yo ywāni Uyu?”

<sup>66</sup> Abene bakāpilikísye ukuti Yeso āli, panongwa yakuti nayumo mwa bene ābagile ukummwagania Umwene, ukwisila mmasukulu gābo. “Yo seminale nki Umwēne āfumileko? Ngimba yo sukulu nki ya bufundakyala Umwēne āfumulieko?”

<sup>67</sup> Kangi momumo kiyilile ikylene umwisyugu. Bingi ba bandu aba bapakiigwe na Mbepo Mwikemo bakaalisile ukufuma ku sukulu yiliyosa mma. Abēne bo fyakukōnga fya busale bwēne bwa Kyalala. Loli ifimanyilo ni fika, kangi ifiswigisyo ifi fyafingiligwe mwi Bangeli, fikukōnga uyu unkulumba Mbepo Mwikemo bo Ikyēne kikwēnda nkati mbāndu.

<sup>68</sup> Kangi abene bikuti umwisyugu, “Yo sukulunki iyi abene bikufumila?” Itolo mbibimbibi pāpo ugwe kwingila nkaya, ukuya nu lusanio, “Kyo kipanga-kipāgūke kiliku iki ugwe kubukako?”

<sup>69</sup> Une nāli nukuyobesania pa Kihano pamusi, nu mpūti gwa kiKatolika gwa kiRoma ukufuma ku kipanga kya kiIrishi mu Louisville. Kangi bo une ngōngelelapo nukwiyoba nīmwenene ku mwēne, u nnunu unnyāmbala gwasukulu, umwene alinkuti, “Tata. Branham, kyo kipanga-kipāgūke nki ugwe uli nakyo?”

Une ndinkuti, “Une ngaya na nakyo nakimo mma.”

Kangi umwene alinkuti, polelo, “Ngimba ugwe gwāsunguligwe?”

Une ndinkuti, “Ena, nkulumba.”

Umwene alinkuti, “Ywani akusūngilikila ugwe?”

<sup>70</sup> Une ndinkuti, “U Ntwa Yeso ālimbele une u Mbepo Mwikemo, ukulumbilila Inongwainunu, kangi alimbele une ubutumigwe.” Mulimōsa, ubo bo busūnguligwe ubu uswe tukufūmba.

<sup>71</sup> Yeso akāyobilēmo siku ku bafūndígwa Bāke, “Būka panja ku...” Une ndikulōndésy’ubusobi ifindu ifyo, lōli ifyēne fītūgéle ilisiku lyābo. Umwēne akāyobile, “Būka, manyila ukuya ndumbilili, kuli ifyīnja *fyakuti-ubwīngi*.”

<sup>72</sup> Umwene alinkuti, “Gūlila umwe nkaya ka Yerusalemu, mpaka umwe mupegigwe na Maka ukufuma ku Mwanya.” Umwēne āyobile ikyo ku banyāmbāla aba bātologwāga ukusimba ingamu syābe bēne. “Kangi ukufuma pa iki, u Mbepo Mwikemo isile pa umwe, polelo umwe mwisakuyaga baketi Bangu, bosa-babili mu Yerusalemu, Yudai, Samaria, kangi ku fiyabo fya kubutali fiyo ifya kisu.” Uko ko busūnguligwe.

<sup>73</sup> Uswe tukaya nu busīmbigwe nabumo isyakuti Yeso ābūkilēmo siku ku sukulu yiliyōsa, pamo ukufwīkigwa ukufuma ku seminale yiliyōsa. Pōpe, galipo amaseminale ukukīndapo gayēngigwe mu Ngamu Yāke, kuli nōngwa ya bwipūti, ukukīnda

ukuya panongwa ya kilikyōsa ikīngi—kilikyōsa ikīndu ikīngi iki kyalimo siku nkīsu. Uswe tukālīmo siku nabo bulibōsa—bulibōsa ubusīmbe bwa Umwēne ukubūkāmō siku ku sukulu. Lōli, pōpe, galipo amasukulu ga kongelēlāpo gayēngigwe mu Ngamu Yāke ukukīnda iyi yilipo iya lulilōsa uluko ulūngi ulwa ngamu iyi yilipo pāsi pa mabīngu, amasukulu. Uswe tukamenyemo siku Umwēne ikusīmba i būku. Pōpe, galipo amabuku agakukīndapo gasīmbigwe isya Umwēne ukukīnda fyōsa ifisyāle fya busīmbesimbe ifi fisīmbigwe. Kangi, umwīsyūgu, i Bāngēli Lyāke lyo Būku ili liganīgwe ukukīnda aga galipo nkīsu kyōsa, pakati pa fyabusīmbesimbe.

<sup>74</sup> Loli, umwe muketile, mu lisiku lya buyatilo, abene balinkulila, “Yo ani Umwene?”

<sup>75</sup> Muketile, Kyala ikwega ikindukimo iki kikuboneka ngati ikyene kikaya nakimo, ukutēndēka ikindukimo ukufuma ku kyēne. Ikyo kyo kikupela Umwēne Kyala.

<sup>76</sup> Kangi akabalilo kako abene balimbwene Umwene ikwisa, itogile ikwīngila i kipata kila, bamo mwa bene balinkuti, “Umwene yo Nnyambala unkulumba.”

<sup>77</sup> Abene bikuyoba ikyo umwisyugu. Silipo i sukulu sya bufundakyala isi sikumanyisya, umwisyugu, ukuti Yeso aali Nnyambala unkulumba, ukuti Umwene aali Nnyambala unnunu. Bamo mwa bene pope bikuyoba ukuti Umwene aali nsololi. Lilino, linga Umwene aali nsololi itolo, pamo Nnyambala unnunu, uswe tuli mu mbibi syitu. Umwene ali nkinda nsololi. Umwene ali nkinda Nnyambala unnunu. Pōpe, Umwene ali Nnyambala unnunu. Pōpe, Umwene ali Nsololi-Kyala. Lōli Umwēne āli nkindapo ukukīnda ikyo. Umwēne āli Kyala abonekīle mu mbili, ukwēga ubutulwanongwa.

<sup>78</sup> Kangi bo Umwene isile, itogile nkati, bingi ba bandu balinkuti, “Umwene yo mbumbulusyi. O, uswe tumbwene Umwene ikwīgula amaso ga bafwamaso. Uswe tumbwene Umwene alinkumpela u nnyambala undemale ukwenda. Uswe tumbwene Umwene ikupa u lwiputo, kangi i sekema yilinkundeka umwanike.” Lōli, polelo, uluko lula bānkōngāga Umwēne panongwa ya mikatu ni swi.

<sup>79</sup> Kangi iyo yo njila ifilundilo fiyīlīle umwisyugu, bingi. Linga alipo u mbumbulusi, fiki, abene—abene bikukonga Umwene, kangi Umwene yo itolo—Umwene yo itolo bufumilamīsi. Linga abene bikubina, abene bikubopa, bikuti, “O, ngimba ugwe ngulāmba unyiputile une, ukuti Untwa Yeso isakupelaga une ukuya kanunu?” Kangi nakalinga itolo bo abēne bikusōka ukufuma ku kipatala, pamo ikitala kyababine, kulakula ukugomokela nkīsu abēne bikubūka, ngati īmbwa ku butēke bwāke, pamo i ngulube ku ndope syāke, bo i Lisīmbo lyāyobile. Itolo ukunkōnga Umwēne kuli iki kinunu abēne babagile ukwēgako ukufuma ku Mwēne. Abene bikumbombela Umwene

itolo ukuya i—i kifwāni, pamo—pamo ikindukimo iki—iki abēne babagile ukwisa ukufuma ku Mwene, kangi batikugūlila ukumbombela Umwene. Ikilundilo kila kikāli kikukindilila umwisyugu.

<sup>80</sup> Bālipo abābukoma lwele-na-yumo bābumbulusigwe, kangi yumo āgomokile ku kumpa Umwēne ulutufyo. Pamo ngimba abēne bāli balongo? Abēne, yumo gwa bēne, āgomokile ukumpa Umwēne ulutufyo, kangi a bāngi ba bēne balinkukīndilila nkyēni, kisitakupālisya.

<sup>81</sup> Kangi linga abandu mwa Amerika, aba babumbulusigwe na Maka ga Kyala, bābagile ukusanusya indumbula syabo kwa Kyala, kwabagile ukuyako uluyigo lukutika ikīsu iki ulu lwīsakwīgāla ifilabu filifyōsa, ifi fyābagile. . . Amalūka ga filūndu kangi amalūka ga kachasyu angāli gikuya pānja pa bukētelo. Ifipānga āngāli fikuya fisulano. Mbuketelela-mafilimu āngāli mukuya bwāsi pa Ndungu nkilo. Kangi āngali pikuyapo uluyigo ukubalanila pānja, ukukīndamo nkīsu iki. Loli akabalilo kako abene bikukibona ikyene kikuboneka, ifindu ifi Kyala ikubomba, abene bakāli bikuywega, “Yo ywani Umwene? Ngimba uyu yo ywani uyu ikwisa? Ngimba ko kugu kuko abene bafumilaga? Ngimba ywani yo uyu? Nu bulagili ngimba iki kyo fiki?”

<sup>82</sup> Nasiku ukwībwa, ku Johannesburg, South Africa. Une nāfikile itolo, kifuki amaminiti malongo matatu bo kukāli, pa ndege. Une nāli masiku matatu ni kilo mu mmwanya, ngatele fiyo ukuti une nubukafu nābagile ukwīma ikyene. Abēne—abēne balinyēgile une pānja ku fibānja-ifibīngilo kūko bamo maelifu malongo mahano pamo malongo ntāndatu abāndu bābūngēne. Kangi mbibimbibipo ukukīnda ukufika pa kigemo, mpaka u Mbepo Mwikemo. . . Une ndinkuketa, ukwisa ukukilania ubuyo, i—i bāsi. Kangi iyēne yāli ni kimanyilo pa yēne, “Durban.” Une nālimbwēne u ndumiana utubwa ikuya nukūmana nukuyōnga ukusōkāpo ukufuma kwa gwīse nu nna, ni kilūndi kimokyēne mainchi ntāndatu pamo lwēle kipīmbapo ukukīnda ikīngi. Umwēne āfwēle i shāti inyēlu, ni fitulikilo fikukolelela isulubali yāke mmwānya. Kangi une ndinkukētésya u nnyāmbala unkeke yula. Une ndinkukēta kunyuma kāngi. Imboniboni yila yākīndīle. Kangi pōlèlo, itolo nkabalilo, une nālubwēne u Lumuli lūla lwitūlike pamwanya pa ndumiāna unkeke yūmo, kubutali kūnyūma nkilūndilo. Kangi une ndinkukēta. Une ndinkwīnogōna, “Une nālimbwēne umwēne pabuyo bumo.” Une ndinkukētésya umwēne, kangi u Bwēlu bula bulinkukūmilīsyā ukukōlēla pamwanya pa mwēne ku maminiti manandī. Kangi une nāgūlilāga ku nsanusī ukukola amasyu amakōnge. Polēlo une ndinkukēta u ndumiana unkeke yulayula ukwīma mmwanya, iikutāga ifyākwēndēla fyāke pāsi, kangi ikilūndi kyāke ikipīmba-amainchi-ntāndatu kyālikile pāsi kifwēne ni kinine.

<sup>83</sup> Kangi une ndinkuyoba kwa Tata. A. J. Schoeman; uyu ali Ndwimiko, ikilo iki. Une ndinkuti, “Tata. Schoeman, itolo andisya amasyu gangu. Iyene yo mboniboni.”

Umwene alinkuti, “Kanunu fiyo.”

<sup>84</sup> Kangi une ndinkuyoba, “Undumiana untubwa itūgèsye kunyuma kula afwēle i shāti inyēlu, kangi ifyakutilikila, umwēne isile ukufuma a kāya akakoleligwa Durba, gamo amamailosi bamia kalongo na bahano ukukilania ikīsu, mu bāsi. Kangi umwēne āfimbilisigwāga ukuyōnga ukufuma ku gwīse nu nna, ukuti ise. Lōli umwēne itike pa Ntwa Yeso, kangi umwēne ali nakyo ikilūndi kimo mainchi ntāndatu kipīmbapo ukukīnda ikīngi.”

<sup>85</sup> Kangi u ndumiāna untubwa yula alinkunyēla mmwanya. Pala umwēne ālipo, ikwīma, ukugela ukwīpilika kuli ifyākwēndēla fyāke. Kangi une ndinkuti, “Ndumiana untubwa, u Ntwa Yeso akubumbulwisye ugwe.” Kangi palala ikilūndi kyāke kikwīsa pāsi mainchi ntāndatu, ukuya kinunu, ni kinine kya fyēne. Kangi abene balinkuntwala unnyambala untubwa ku kigemo, kangi abaganga balinkunkētésya umwene pala. Umwe muketile ikifwāni kyāke mwa buku gwangu.

<sup>86</sup> Une nālīmīle pala itolo utubalilo tunini, une nālibwēne ilinīni, iligali lyambindimbini likubopa ukusuluka pa nsebwe, kangi ilyēne lilinkutelemuka. Ilyēne lilinkusyūmbutuka ukusyūngutula, kubwakunyūmba, kangi lilinkutika ikipiki. U nkeke, undīndwana gwānyili-nyēlu āli...āli ni nyuma ingonyoke. Kangi une ndinkuyoba, “Une ngukēta akanīni, akagali kambindimbini aka kāselemukīle mu mpiki gumo, kangi undindwana gwanywili-nyelu gwa kifuki fyīnja kalongona-lwēle mbukusi ali nu nyuma yikonywīke. Umwene ali mbwitugasye ububibi.” Nayumo ālyāmwīle. Kangi une ndinkutoligwa ukumbona umwene kulikosa mu kilundilo kila, ikilundilo ikinywamu ikya bandu. Kangi une nālīmīle pala itolo kuli amaminiti manāndi. Une ndinkuti, “Pilikisya. Ikye kyo...Komma ukuya bakwīlāmwa. Umwene yo Ntwa Yeso, mu Maka ga busyuke. Umwene alintumile u Mbepo Mwikemo ukukindilila imbombo Yake.” Kangi pala une ndinkuyibona imboniboni yikuboneka kangi. Kangi une ndinkutoligwa ukumbona unkikulu untubwa.

<sup>87</sup> Itolo pala, pimile palapala pa nkyeni pa une, apa palinkwima u Lumulī lula, mumo umwe mukukēta pa picha. Kangi Ulwēne lulinkwima apa. Une ndinkufyuka pala, kangi pala umwene ālambalēle, pāsi pa kigemo. Une ndinkuti, “Nkīkulu nkeke, u Ntwa Yeso akupelile ugwe ukuya kanunu.” Kangi umwene alinkwanda ukukūta.

<sup>88</sup> Unna alinkuti, “O, umma! Komma ukumbula umwene ukuti afyuke mmwanya!” Ikuti, “Linga umwene ikusema, umwene ikufwa.”

<sup>89</sup> Kangi u nkikulu unkeke yula alinkunyela pa malundi gake, ikuywega, nukuntufya Kyala. Kangi u māma alinkusilika nukugwa mu kitala iki undindwana ālambalélemo.

Kyo fiki ikyēne?

<sup>90</sup> Itolo kifuki akabalilo kala, u nnyāmbāla yumo undondesya-busobi alinkufyūka mmwanya nunyuma kula, nukwīma ni luyayo lumo pa kikōta kimo, kangi ulūngi pa kīngi, kangi alinkuti, “Ugwe, Mmerika! Une ngutātikana na ugwe ukumbula une yo Ngamu nki iyi ugwe kubombelamo iki! Kangi kyo kipanga-kipāgūke kiliku ikya kipanga iki ugwe kubukako?” Muketile?

<sup>91</sup> Ikyene kyo itolo kifwene. Abene batikupilikisya. Abene batikulondēsya findu ifi. Ifipanga fitikulondesya ku Kwisa kwa Ntwa. Kangi u Mbepo Mwikemo ali apa ukusisimikisya u Kwisa Kwake, ukukitwala Ikyene kukuboneka. Fingi fiyo . . .

Aligwesa ikulonda ukwega injila yake yene. Iyo yo njila ikyene kyāli kula. Ikibugutila kilikyosa kyāli ni fundo yabo bene.

<sup>92</sup> Lōli ilyo likaya lilaalusyo ikilo iki. Ikyo kikaya iki une nguyobelapo. Loli ililālūsyo une ngukulālūsya ugwe, lyo, ngimba ugwe kwinogona fiki Ikyene kili? Ikyene kyo kili kwa ugwe. Yo ywani Uyu ikufyuka mwanya-nu-pāsi mfikolo? Komma abanyāmbāla. Abanyāmbāla bakabagila ukubōmba ifindu ifyo. Uyo ywani Umwēne uyu ikuyoba nu kuyoba ku bandu nkilundilo, bo, “Itugesye papapa *apa*, ukukilania *apa*,” kangi amabuyo amakindanekindane mu lukomano, akabalilo kāko abakīkūlu na banyāmbāla bātswālīgwe nkati muno, bikufwa? Ngimba Ikyēne kyo ywāni?

<sup>93</sup> Unkīkūlu unkeke yula uyu ālyēndile nkati mbokēsyo ulubūnju ulu, uyu imilūngu mitatu igi gikīndilēpo, ikufwa na kānsa gwa kasinoma, ikwītūgala papapa apa pa Lukīndi Maple, Nka. Baity. Kangi une ndinkubalālūsya aba dokotala batatu aba bāli nu mwene. Umwene akāli nu lusako nalumulwene ukuya nu bumi, na bāna banini bana pamo bahano, kangi u māma gwangu ikugela ukuswila abene. Māma alinkuti, “Bill, umwene atisakwisamo siku ku kāya kangi.”

<sup>94</sup> Kangi une nābūkīle panja kūko umwēne āli, kangi u Ntwa Yeso āyobīle, “ISI SYO IKUTI U NTWA, linga umwene isakubukaga ku kipanga nu kufinga ukōsigwa mu Ngamu ya Ntwa Yeso, kangi isakumbōmbēla Kyala, umwēne isakubūkāga kukāya, mulimōsa.”

Kangi une nalindalusisye umwene, “Ngimba ugwe kubombaga iki, nkikulu?”

<sup>95</sup> Kangi umwene alinkuti, “Fyosa iki ugwe kuyoba, une ngubombaga ikyene.” Palapa ububabe bulinkuleka. Amasiku



matatu pankyēni pāke, umwēne āli ku kāya, kangī abagānga bikutoligwa ukwāga nakasyalikile kamokēne ka kānsa yula.

<sup>96</sup> Ngimba Yo ywāni Uyu yūyo ikwisa mu Ngamu ya Ntwa? Yo ani Umwene? Umwene yo Mbepo Mwikemo gwa Kyala. Ngimba amīnogono ga Ikyēne? Ngimba amīnogono gīnu go fiki, mumēnya untīmi gwīnu? Kangī akabalilo kako bitugesye mfikota ifi apa, abandu ukufuma panja pa kāya, bitugesye ni fisilisi, bitugesye ni. . . Apa itūgēsye u nnyāmbāla, pabuyo bumo nkati muno, u nkūdwe gwa kiMenonite, papapa apa, unkubilwa ni fisilisi. Nasiku ukummanyamo pamo ukumbonamo umwēne, nakimo ukufwāna nu mwēne. Kangī nakalinga itolo, kifuki fyīnja fibili ifi fikīndīle, une ngusakikisya, pamo ikindukimo, ena, ifyīnja fibili, u Mbepo Mwikemo alinkukikolela ikyene, kangī alinkuti “ISI SYO IKŪTI U NTWA.” Umwene akaya nako siku nukugwa ukufuma pala. Yo ywani Umwene? Yo ywani Umwēne?

<sup>97</sup> Unkikulu uyu ālitugesye apa, Pandungu ugu gukīndile, akabalilo kabumalikisyo une nāli apa, twālisīle ukufuma ku buyo bumo mu Illinois. Iisiku ilikonge. . . Ni lyūlu ilinywāmu mu mbili gwāke, ili lyābāлага. Kangī bamo mwa banunu-fīyo aba sayansi gwa mikota ba Illinois bāmmwēgelāga umwēne ku kiliniki ingulūmba, ukuti bakampānje, Kilēmbēlo. Kangī umwene alinkwīfimbilisa injila yake nkati. Ngambonamo siku umwene pamo alinkupilika isya umwene, mbumi bwangu bosa. Kangī mbibimbibi itolo, u Mbepo Mwikemo alinkukupilila umwene, kangī Umwene alinkumbula umwene uyu umwene aali, kūko umwēne āfumileko, kangī umwēne āyaga pakupānjigwa ilisiku ilikōnge. Balinga bāli apa akabalilo kala, ukukibona kila? Kangī kēta inongwa yikwēndelega ukugomokela. Iisiku ilikōnge, akabalilo kāko umwēne ābūkile ku bagānga, abēne balimmwēgile umwēne ukufuma ku kiliniki ukubuka ku kiliniki, kangī bakabagīla ukwāka akasyālepo kamo ka ikyēne.

<sup>98</sup> Yo ywani Uyu? O, Kyala yaga gwākīsa! Ngimba yo ywani Uyu uyu ikubomba iki? Ngimba ugwe ubagīle ukusulwa ukuyoba ikyēne āli ntīmī gwāko? Siku. Ngimba ugwe ubagīle ukusulwa ukuyoba abāndu bāli na kandu kalikosa ukubōmba mu kyēne? Nasiku. Ikyēne yo Mbepo Mwikemo, u Mbepo uyu aali pa Ntwa gwitu Yeso. Kangī Ukwisa ikwīsa ukwibungānia Mwene ni Kipanga Kyake, kili kifuki fiyo mpaka Umwene ikubalanila pānja ulu u Lumuli Lwake ulukulumba, ukutabula, kangī ukutwala mbulilanisi, i Kipanga kya Kyala gwabumi, panongwa ya Kunyakiligwa uko kuli kifuki ku kiboko. Amen!

<sup>99</sup> Yo ywāni Uyu? Une ngabagīla ukwāmūla ililālusyo lyāko. Une ngabagīla ukūkwāmūla ugwe. Lōli une mbagīle ukwīyāmūlila nīmwene. Kangī ukukilania i kegemō ikikemesigwe iki, ikilo iki, mu mbulukutu sya iki, ububīkisye, kangī a—a būligwe ba Lilopa Iya Ntwa Yeso, une nguyoba iki ukufuma pāsi pa ndumbulā yangu. Komma panongwa yakuti ukuti une ndi yūmo gwa umwe, komma panongwa yakuti une ne

itolo mündu yumo unkĩndàne, lōli yumo mwa batabuligwe uyu asũkĩgwe ni Lilopa. Une ngwitika ukuti u Lumuli lulalula ulu lwĩtulike mu kipanga iki, ikilo iki, yulayula Yula ikunāngĩsya, ukwisila mu kipeligwa Kyāke, ukuti Ikyēne yo Yeso Kristi, mbubumbigwe bwa Mbepo Mwikemo.

<sup>100</sup> Aligwesa uyu amenye i Lisimbo, amenye ukuti Yeso āyobĩle, “Une nisile ukufuma kwa Kyala, kangi une ngubuka kwa Kyala.” Bo Umwene akāli ukupeligwa mbili, akabalilo kako na Mōse mmatengele, Umwene āli Mbanda ya Moto. Kangi akabalilo kāko Mōse alinkunyonywa ukunketa Umwēne, Umwēne alinkukilania ifiyabo Fyake ifyākunyuma ku mwene. Kangi Mōse alinkuti, “Umwēne ikuboneka ngati Nnyambala.” Akabalilo kāko Umwēne aali apa pa kisu, Umwene aali Nnyambala. Umwene abombile ifindu filafila ifi Umwene ikubomba, umwisyugu, ukwisila mbanyambala aba Umwene atabwile. Pala Umwene ikwisa nukuya ni kifwani Kyake kyegigwe. Ngimba ikyene kyo fiki?

<sup>101</sup> Ukufuma pa bufwe Bwake, ukusyiligwa nu busyūke, Pauli āli pa nsebwe gwake ugwa ku Damasiko, ilisiku limo, kangi u Lumuli ulukulumba lulinkundupulila umwene pāsi. Abanyambala bala ukusyungutila umwēne bakālubwēne u Lumuli lula. Lōli Ulwēne lilinkuntikila Pauli pāsi, mpaka Ulwēne lulinkumpela umwene ukuya mfwamaso. Umwene ali nu lutamio na maso gake u bumi bwake bosa. Kangi umwene alinkuyoba akabalilo kamo, “Ukupāgulapo papo une njege mfyūsīgwe ukukĩnda u bwisule bwa busetuli, bwapegigwe kwa une,” u mwifwa mu mbili gwāke, u ntumigwa gwa Sētāno, ukumpūlānia umwēne. Panongwa yakuti ikyene kyaali bwisusye bwa busetuli.

<sup>102</sup> Kangi akabalilo kāko Pauli ātikiligwe pāsi, pa nsebwe gwāke ukufwīma abāndu aba batēndekāga unjwēgo mwīngi fiyo; ikibugutila ikipāpigwe-kāngi, a bāndu aba bākōleligwāga basāmbuke. Pauli āli pa nsebwe gwāke ugwakufwīma bala, ni fikalatasi mu nyāmbi yāke, ukubakamata abēne nukubatwāla abēne ku Yerusalemu. Kangi ukufwana pakati pa lisiku, pala palinkwīsa u Bwēlu pāsi, ubu bwālinkomīle umwēne ukufuma pa malundi gāke, ukubūka pa kipālo, kangi umwene āgwīle mu lufumbi lwa kīsu. Palikwīsa i Lisyu ukufuma Bwēlu bula, liyoba, “Sauli, Sauli, fiki ugwe kumfwīma Une?”

<sup>103</sup> Kangi Sauli alinkusyūmbutūka, nkayīlo kāke akafwamaso, alinkukēta pamwanya. Kangi umwēne ābagile ukukēta ibukulumba bula, u Bwēlu bwālwīmīko. Kangi umwene alinkuti, “Ntwa, Yogwe ani Ugwe?”

<sup>104</sup> Umwene alinkuti, “Une ne Yeso. Une mfumile kwa Kyala; Une nābukile kwa Kyala. Une nisile ukufuma kwa Kyala; Une ngugomokela kwa Kyala.” Umwēne alinkuti, “Ikyēne kyo kikafu kuli ugwe ukubāya ukulwāna ni fyākulasa.”

<sup>105</sup> Ubusetuli bumobwēne pa nsānga unkemesigwe gula, akabalilo kamo pamwanya pa buyo bula, unnyāmbala akabagila ukuya yulayula. U mūndu, bo umwēne akāli ukwikōléla mwēne Nkristi, bo umwēne akāli ukwilīngānia mwēne, umwēne abāgile ikyākwānda ayege nu bwēndemo bwa kunyuma-kwalulangalanga, kūko umwēne ālyāgēne na Kyala, pamāso na māso.

<sup>106</sup> Kabuno, umwisyugu, ugwe ubagile ukuya nu luko lulilosa ulwa lyāmulo. Ugwe ubagile ukunkēta u Ntwa ikubōmba itolo katikati iki Umwēne āyobile bōmba, kangi abafundakyala abakomu bisakulīngānia Ikyēne ukusōsyāpo. Abēne bisakuyobāga, “Ikyo kyāli kya lisiku ilingi. Ikyēne kyāli kya *iki*. Pamo, Ikyēne kyo kya ngulilo iyingi. Pamo, Ikyēne kyo kisobi.” Bomūmo abene bāyobile isya Yeso, “Umwēne yo Bezebabu, u mōhesi. Umwene ndagusi.” Kangi i findu fyosa fila, abene bali nu lwāmulo lumo.

<sup>107</sup> Loli akabalilo kāko u nnyambala isilemo siku mu kupalamāsānia na Kristi, kangi alimbwene Umwene bomūmo Pauli ābombile, pamo bammwēndilemo Umwēne, bakayapo nabamo abakufwāna abafundakyala nkīsu ukuyamo siki bākubagila ukulīngānia ukusōsyāpo ubwēndēlo ukufuma ku mūndu yumo.

<sup>108</sup> Iyo yo nongwa, umwisyugu, abene bakaya nu bwendelo. Iyo yo nongwa abene bakabagila ukuyoba. . . abēne bōsa bikuyoba, “Yo ywani Uyu? Ngimba Iki kyo fiki? Ngimba Ikyēne kikufumila kugu?” Abene bakaya nalyo ilyakwamula. Fiki? Panongwa yakuti, kyosa abene bamenye bo bufunda-kyala ubu ikipanga kimo kitendike. Komma “ukumanya ubufundakyala” bo Bumi. Komma “ukumanya ili Bangeli” bo Bumi.

<sup>109</sup> Loli “ukumanya Umwene” bo Bumi. “Ukumanya Umwene” ukuya Mpoki gwakonagwako, ukuya Yuyo Uyu īswīsyē ugwe nu Kuyapo Kwake. Ugwe gwāli kula akabalilo kāko ikyēne kyābonīke. Akayapo nayumo abagile ukwēga Ikyēne ukufuma kwa ugwe. Akayapo nayumo ntiga uyu abāgile ukulingania ukusōsyāpo Ikyene kwa ugwe. Akabalilo kāko ikyakuboneka kila kikuboneka kwa ugwe, ugwe kumanya Uyu Umwene ali. Kwa une, Umwene yo Yeso Kristi yulayula mmayolo, umwisyugu, na bwilanabwila.

<sup>110</sup> Ngimba yo ywani uyu ikubomba ifika ifi? Yo ywani uyu ikubomba imbombo ingulumba isi? Ngimba umwene yo ndumbilili? Ngimba umwene yo Oral Roberts? Ngimba umwene yo Billy Graham? Ngimba ikyene yo Jack Schuler? William Branham? Kilikyōsa ikyēne kibagile ukuya, abēne bakaya nakyo nakimo ikyakubōmba mu kyēne. Abēne bo fyombo.

<sup>111</sup> Umwene yo Mbepo Mwikemo ikusooka panja ni Nongwainunu, mu fimanyilo ni fiswigo ni fika, ukupela abandu

bītendekisye. Imbepo yinyenyemusigwe nu bugūlili, na bītiki ukugūlila Umwēne ukwisa.

<sup>112</sup> Kangi abangi bikuyoba, “Fiki isasanio isi? Nongwa ya fiki uswe tukuya ikyēne? Unko uswe tusēngāme pāsi ku kipānga kimo.” Fiki, ikyene kiyobigwe nkipanga papapa apa, ukuti, akabalilo kāko uswe twālyāndīle ukuyenga i kipanga ikipya, balinkuti, “Uswe tutikulonda ifika. Uswe tutikulonda ifindu ifi kangi mma. Ugwe kulonda ifyene, bukaga panja pa ngunda kuko ifyene fikuboneka. Uswe tutikulonda ifyene apa.” Akabalilo kāko i Branham Tabernacle yikwīnāma ku bula ubuyo ubwāpasi, iyēne yibile.

<sup>113</sup> Ikipanga iki kyo kyālyāligwe pa fundo na Maka kangi i Nongwainunu ya Yeso Kristi. Kangi akabalilo kosa aka ikipanga iki kikwima, u Mbepo Mwikemo alikwaga ukufikila ku myoyo, ukuponesya, kangi ukwīsusya na Mbepo Mwikemo, kangi ukubumbulusya ababine. Kwa une, Umwene yo Yeso Kristi yulayula mmayolo, umwisyugu, kangi bwilanabwila.

Unko uswe twipute.

<sup>114</sup> Linga ugwe ukampanya Uyu Umwene ali, ugwe ukampanya iki fyosa ifi fyo fiki, kangi ugwe kulonda ukumanya, ngimba ugwe ubagile itolo ukubōmba ifingi fiyo bo ukufyūsya ikiboko kyāko? Kangi yoba, ukwisila mu kufyusya ikiboko kyako, “Nyiputīla une, Nkundwe Branham, ukuti une ngummanyaga Umwēne.” Kangi u Ntwa akusaye ugwe. Kangi mosa ukusyungutila, une ngukēta amaboko gīnu.

<sup>115</sup> Lilino, Tāta Gwakumwanya, uswe tukutwala i Ndumi iyi, kangi iseke sya bandu bikufyusya amaboko gabo, ukuti abēne bikulōnda ukumanya Yūyo Uyu ali. Abēne bikulōnda ukumanyana na Yeso unkulumba uyu. Ukuti, Ukwisa Kwake, ukwa busyuke, kuli kifuki fiyo, mpaka ababine bikuya babumbulusigwe. Kangi ukufūma pāpo ikyo kyābonike pa buyo, polelo ubusolōli lwālīsile mu Kipānga, polelo ifikūngilwa ni fika, lilino ukusuluka ku kimanyilo kyabumalikisyo kila. Ikyakukōnga kisa kwīsa, u Bunyakiligo, i Kipanga kisakwegigwaga. Kangi uswe, Ntwa, twe twīyobelāga ukukumanya Ugwe mu Maka ga busyūke Bwāko, uswe tukugūlila, kangi tukwīsyūka, nukulila, nukulāmba “Gweisa, Ntwa Yeso!”

<sup>116</sup> Nyakāga i Kipānga Kyāko nukukyēga Ikyēne ukusōkāpo, mbimbibibi, Ntwa. Kabūno, lululu, abanyāmbāla bisakupufulāga i kīsu iki Ugwe gwāpelile kuli abēne ukwītūgalāpo, panongwa yakuti abēne basūlile Ugwe. Abēne bakafūnda ulutēngāno, lōli ubwīte. Abēne bakafūnda ubugolofu, lōli abēne abēne bafūndile ubunyāmbūta. Mūmo fikuti abēne bakābagile bōsa ukuya ba njala ya maka! Ntwa, akabuyo akanini kalā mu ndumbula syabo aka kapelaga abene ukuya banjala kuli amaka, abēne bikugela ukwīkutisya ikyēne

mu nnyumba-syasayansi kubuyo bumo, ukupufulania abāndu bīnabo.

<sup>117</sup> Kyāla, linga abēne bābagile itolo ukusyāgānia ukuti amaka gala aga abēne bikulōndēsya go Maka ga busyuke bwa Mwanundumiana gwa Kyala, a Maka ga Mbepo Mwikemo ukusanusya imyumi gyābo; kisita kupufula ifisu, loli ukusanusya ubumi bwabo kangī ukubapela abene ukuya babombambombo Bako.

<sup>118</sup> Abāndu bīngi, batikīgwe nu kigili kyandīsyu, abēne bikulīngānia uswe ukuya kipāambo kya “kisita kumanya nakimo,” kangī—kangī ukuya “basāmbuke,” bo abēne bābōmbile mmasiku agāpakwānda. Lōli bo abēne bagomokīle, bikusangaluka, ukukupālisya Ugwe ukuti abēne bābagile ukupimba ulufuyulo lwa Ngamu Yāko. Uko ko kwīpilika kwa bana Bako, ikilo iki, Ntwa, kulikosa. Uswe tuli itolo bahobofu.

<sup>119</sup> Bamo mu lisiku Lyako bāgelīle ukukulīngania Ugwe. Abēne balinkuti, “Umwēne yo mwīnāke gwa nnyāmbāla ugwāndisu yula, Yohāni, uyu āfumile ku matēngēle kifuki kisita kufwāla imyēnda, itolo ikipapa kyang’ōsi ikyaiyolo kiniēmbigwe ukusyūngutila umwēne. U nnyāmbāla gwāndisu uyu āsopāga amasyu, kubusōkēlo na kubwīngililo, kangī āyobile, ‘I ndwānda yilāmbalikigwe ku misisi gwa mpiki.’” Balinkuti, “Umwēne yo u—u nkōngi gwa umwēne. Umwēne yo nnyāmbāla gwa ndisu. Umwēne yo nsyūtano. Umwēne asōkilemo mu līnogonelo Lyāke.” Ubutumigwe ubukindakipeligwa ubu bwaali na Ugwe, O Ntwa, bwāgōgile amaso ga bala.

<sup>120</sup> Kangi mo mumo kiyilile ikyene kangī umwisyugu: U Mbepo Mwikemo unkulumba uyu ikutala u Kwisa kwa Ntwa, mumo Yohāni ābombile mu lisiku lyake, ukugog’amaso a bāndu, ku bala bābo batikulōnda ukukēta. Lōli ku bala aba bīganile ukuketa, Ugwe ubasalile abene. “Kangi bōsa aba Tāta ambele Une bisakwisaga kwa Une,” Ugwe gwāyobīle, “kangi nayumo gwa bēne bisakutāgigwāga. Kangi une nisakusyūsyāga umwēne mmwanya ku lisiku lwabumalikisyo.” Uswe tukupālisya Ugwe panongwa ya iki.

<sup>121</sup> Kangi bala bābo bafyūsīsyē amaboko gābo, ikilo iki, uswe tukusuma, O Ntwa Kyala, ukuti Ugwe kwitēndekāga Gwīmwēne ukumanyigwa ku bēne, mu bwendelemo bumo, mu Maka ga busyuke. Tupaga ikyene, Ntwa.

<sup>122</sup> Kangi abangi babāgile ukuya apa, aba bakafyusisye ikiboko kyabo, loli palema, mu ndumbula syabo, abene bameenye ukuti abene balondigwaga ikyēne. Une ngusuma ukuti Ugwe kubasayaga abene, nukubapa abene ikinyonywo kya ndumbula syabo.

<sup>123</sup> Akabalilo kako uswe tukusōkāmō mu nyumba, ikilo iki, tulibukaga uswe ukuya bandu abakindane. Tulibukaga uswe ni fundo ingindane ukukinda mumo uswe twayiliile, linga ikyene

kyalwanaga nu bwigane Bwako ubwabunyakya. Tuli sookaga panja ukuya nu ulwikasyo ukukola i mbembe sya kigemo, mpaka u moyo gwitu gwikutisigwe ukuti uswe twāli nu bwendelemo na Ugwe, kangi uswe tumenye isya Yūyo uswe tukuyoba, nongwa yakuti uswe twāgēne nu Mwēne nukumanya Umwēne, nukuya nu bulilanisi nu Mwēne. Tupaga ifindu ifi, Tata. Bumbulusyaga ababine na bonywa.

<sup>124</sup> Sayaga untimi gwitu unganigwa kangi umpala. Kyala, uswe tukusuma ukuti Ugwe kuyaga nu mwēne na bākalumbu bake abaganigwa, akabalilo kāko abēne bikwimba Inongwainunu, nukuluumbilila Iyene mu rediyo yabo.

<sup>125</sup> Sayaga abahesya aba bali mfipata fyitu. Ntwa, abēne balisōkāga pānja, ikilo iki, nu kunyenemusya mu ndūmbūla syābo, ni fundo ukuti abēne, ukufuma pa sala iyi ukubuka nkyēne, linga abēne bakakumanya Ugwe kangi bakakubōmboēla Ugwe, pabutasi, abēne balikubōmbelaga Ugwe. Bo tumenye iki, ukuti, “Ifindu fyosa ifingi fikwisaga ku nakimo, loli i Lisyu lya Ntwa lisakusyalaga bwilanabwila.” Tupaga ikyene, Tata.

<sup>126</sup> Tuswaga uswe, syōsa isya mbībi syitu. Kangi uswe tuli aganāga pa buyo ubukulumba bula... [Ubuyo busitakandu pa tepi—Nsimbi.]

Panongwa yakuti Umwene alinganile une  
Kangi ālyūlīle ubupoki bwāngu  
Pa mpiki gwa Kalvari.

<sup>127</sup> Lilino, ukufuma pa Ndumi, unko uswe itolo twinamisye imitu gyitu nukumwīputa Umwene, akabalilo kako uswe tukwimba ku Mwene.

Une nunganile Umwene,  
Ni ndumbula yako yosa.

Une nunganile Umwene  
Panongwa yakuti Umwene alinganile une  
Kangi ālyūlīle ubupoki bwāngu  
Pa mpiki gwa Kalvari.

<sup>128</sup> Balinga aba naloliloli bangānile Umwene? Fyusya ikiboko kyako, yoba iki nu nketi yumo, “Une nunganile Umwene.” O, ngimba Umwene akaya nswigisye? Umwe mumenye, une itolo nkiganile ukwitugasya bo ulu nukunwa itolo mu njila, u Kuyapo Kwāke. Lisyu Lyake, libukile panja, Ilyene ligwīlīle mu ndumbula. Ilyēne likutufunda uswe. Ilyēne likututwāla uswe mu kupilikila kwa Mbepo Gwāke. Mūmo kuyīlīle kumogi ukwēne itolo ukummwīputa Umwēne polelo! Lilino, bo umwe mukubūka ukufuma ku kipānga, ikilo iki, būka, mukummwīputa Umwēne.

<sup>129</sup> Kangi kumbukilaga, undungu ugu, lulipo ulukomano lwa lwīpūto apa pa kilo kya Kitatu. Komma ukwībwa ubufumusye

bwa Nkundwe Neville pa Ndungu, pamo pa Mpyagilo, pa sala ya lwele-na-yimo, ukukilania WLRP. Une itolo nkiganile ukupilika abène, bule umwe? Ubwĩmbi bwābāna, pamo bwābatātu, bukupiligwa bumogi. Nkasi na une, kangi a bāna, uswe twēsa tukwēga i rediyo innini pānja kangi—kangi tukwītulika ukusyungutila iyēne, ukumpilikisya Nkundwe Neville nu bufumusye bwake, kangi amasyu gāke amanunu, isya mūmo umwēne ikumfyūsyā Kyala yūyo umwēne angānile kangi ikwītīka. Komma ukuyoba iki ku . . .

<sup>130</sup> Umwe bahesya apa, linga umwe mukaya ni kipanga ku kāya, isaga yaga nanuswe. Une ngubabula umwe, komma ukuyoba iki kangi umwene itugesye apa. Umma, nkulumba. Une njobile iki, utubalilo twingi. Une nunganile Nkundwe Neville. Iki, ikyakwanda, umwene yo mfundakyala. Ikindu kyakwanda, umwene yo mwana gwa Kyala. Ikindu ikikonge, umwene yo yulayula lisiku lililyōsa. Une nummenye umwene ku fyinja. Umwene akasanukamo siku, na panandi. Umwene akaali yo Orman Neville, ugwambombo gwa Ntwa Yeso. Kangi une ngwinogona umwene ali . . .

<sup>131</sup> Ikilo kimo, une ndinkukōlela pala, ukunsuma umwene linga umwene akābombile, mu lubatiko lwake, ābagile ukutēndēka ubuyo kuli uswe ukwisa pāsi nukwīputīla ababine. Bālipō bāmo bikwīsa nkati, kwāli ulubūnju ulu, umwe mumenye. Kangi unkasi gwāke unnini ālyāmwiē i foni, kangi une nāyobaga ku nkasi gwangu, kunyuma kula, ukufwana ni kyene.

<sup>132</sup> Kangi mumo uswe tukupalisya Kyala panongwa ya nkasi gwake unganigwa unnini kangi ikikolo kyake. Ikyo kyo kinunu fiyo. Akabalilo kāko ugwe kumbona u ndumbilili nu nkasi gwāke ukwisa pala bo lula, mbunoge kangi ulwiuyūfyo, ikyo itolo kikutēndēka ikipānga ukubūka ikyo kanunupo fiyo. Ikyo kyo itolo kinyafupo mumo amasiku gikukinda.

<sup>133</sup> Ugwe unganile Umwene ni ndumbula yako yosa? Umma ndaga. Uswe tulinayo ulwĩmbo ulwakusātīla ukuti uswe tukwĩmba, *Ega i Ngamu Ya Yeso Na Ugwe*. Kangi tupapo uswe akasambo akanini, kalumbu, linga ugwe uli nalo ulwene pala mwa buku. Kangi uswe tukwimbaga ulwimbo lwitu ulwakusātīla. Kangi akabalilo kako uswe tukwimba ilinandi lyakwanda, uswe tukulonda ukusyumbutuka, ukuponania amaboko ga yumo nu nnine. Umma ndaga. Tupapo uswe u lusambo.

. . . i Ngamu ya Yesu na ugwe,  
Mwana wa busulumanie ni soka;  
Iyene ubuhofu nu lupembusye lisakukupaga,  
Ega Iyene kulikosa ugwe kubuka.

Ngamu Imbala, O yo nyafunki!  
Lusubilo lwa kisu kangi buhofu bwa  
Kumwanya; (Kyala akusaye ugwe, nkundwe.)

Ngamu Imbala, O yo nyafunki!  
Lusubilo lwa kisu kangi buhofu bwa  
Kumwanya.

Unko uswe twēge ili linandi ili lilino:

Pa Ngamu ya Yesu tukwinama,  
Tukugwa bulambalale pa malundi Gake,  
Mwalafyale gwa banyafyale ku Mwanya  
bisamfwika ingiga Umwene,  
Akabalilo kako ubulendo bwitu bumalike.  
(Ngimba ikyo kitisakuyaga kyakwiyela?)

Imbala . . . (Ngamu Imbala!) O bunyafu buki!  
Lusubilo lwa kisu kangi buhofu bwa  
Kumwanya;  
Ngamu Imbala, (Ngamu Imbala!) O yo  
nyafunki!

Lusubilo lwa kisu kangi buhofu bwa . . .

<sup>134</sup> Balinga bikukūmbukila akīmbo kītu akanini uswe twālisibile ukwimba, *Komma Ukwībwa U Lwīpūto Lwa Kikolo?* Umwe mukukumbukila ikylene? Une ndiku . . . Thelma, kali ugwe umenye ulo, pamo ulusambo, pamo mma? Unko uswe tugele ulwene kamokene. Ngimba umwe mutikukumbukila ulwene? Unko uswe . . . Lumo une mbagīle ukugela ulwēne kamokene na umwe.

Komma ukwībwa u lwīpūto lwa kikolo,  
Yeso ikulonda ukwagana na ugwe mula;  
Umwēne isakukwēgāga imbāsyō syāko syōsa,  
O, komma ukwībwa u lwīpūto lwa kikolo.

<sup>135</sup> Balinga bali ni lwiputo lwa kikolo? Ikyo kyo kinunu. Unko uswe tugele ulwēne kāngi. Une nisakugomokelaga kāngi nkati mula. Une nkiganile ikyo. Twēsa palikimo lilino:

Komma—komma ukwībwa u lwīpūto kwa  
kikolo,  
Yeso ikulonda ukwagana na ugwe mula;  
U mwēne isakukwēgāga imbāsyō syāko syōsa,  
O, komma ukwībwa u lwīpūto kwa kikolo.


<sup>136</sup> O Ntwa, ukwene kusimbigwe mu Masimbo, ukuti abene begaga ukufuma mumbili gwa Pauli ififunga pamo utwakupiyila, kangi imbepo inyali silinkusōka ukufuma ku bāndu, ni mbungo silinkubumbulusīgwa. Uswe tukwīpūta, O Ntwa, ukuti bo injila yilayila, ikyēne kisakunāngisīgwa pa ifi, ikilo iki, bo une ngutuma ifyēne ku bafūmbwe na babīne. Panja kubuyobumo mu fisu, alipo yumo ikugūlila nukugūlīla iki ukuboneka. Une ngusuma, Tāta, ukuti Ugwe kupaga ikylene mu Ngamu ya Yeso, u Mwanundumiana Gwako. Amenī.

<sup>137</sup> Lilino une nguyaga pakunsuma, bo uswe tukwinamisya imitu gytu, linga u Nkundwe gwitu umpala Smith ukukilania



kula, ukufuma ku Kipanga kya Kyala, uyu uswe tummwāgīle, itolo bo yu Nkundwe gwītu Neville apa, ukuya nsūbilīgwa, ugwambombo gwa Kyala, Une ngunsumaga umwene ukusuma isayo pa umwe, ukukindilila ukukinda undungu ugu gukwisa. Kyala abasaye umwe, mpaka uswe twagane na umwe kangi. Nkundwe Smith.

[Nkundwe Smith ikwiputa—Nsimbi.] Ena, Ntwa. Tupaga ikyene, Ntwa. Ena. Ena. Ena. Ena. Ameni.

<sup>138</sup> Ponania amaboko ga yumo nu nnine. Mukwambililīgwa ukugomokela kangi, ku kipanga. Kyala abasaye umwe. 

*YO YWĀNI UYU?* KYA59-0510E

(Who Is This?)

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Lisiku lya Mama, pa Ndungu namayolo, Meyi 10, 1959, ku Branham Tabernacle mu Jeffersonville, Indiana, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)